

**Naalakkersuisut peqquneqarnissaannik Inatsisartut
aalajangiiffigisassaattut siunnersuut, Naalakkersuisut
ataatsimiitaliarsuarmik pilersitsissasut pinerlussimanermi
pillaasarnermut inatsimmik suliarinnittussamik aammalu eqquassisussamik.
Ataatsimiitaliarsup suliariumaagai Inatsisartut ukiaanerani
ataatsimiinnermi 2025-imi saqqummiunneqassapput.**
(Inatsisartuni ilasortaq, Kuno Fencker, Siumut

Kalaallit Nunaanni pillasernermut inatsi eqqunnissaanut piareersaatit suliniutillu pisariaqartut aallartinnissaanut tunngavissamik pilersitsisussamik aallartisartoqarnissaa anguniarlugu, Naalakkersuisut rigsmyndighed attaviginnissaanut piumaffigineqarnissaannik Inatsisartut aalajangjiffigisassaattut siunnersuut

(Inatsisartuni ilaasortaq Anna Wangenheim, Demokraatit)

Akissuteqaat

(Inuussutissarsiornermut, Niuernermet, Aatsitassanut, Inatsisit Atuutsinneqarnerannut
Naligiissitaanermullu Naalakkersuisoq)

Siullermeerneqarnera

Pillaatissiissutaasunut killiliussat equnneqarnissaat pillugit aalajangiiffigisassatut siunnersuutinut taakkununnga marlunnut siunnersuusiosrimasut Naalakkersuisut qutsavigiumavaat. 2023-imi ukiakkut ataatsimiinnermi politikkikkut oqallinnernit oqallinneq piissusissamisoortumik nanginnerivaat, tassani iliuusereriikkanut kingunerititat killiffii Inatsisartut oqallisigaat.

Inunnut navianaatilimmik pinerluttuliornerit appartinneqarnissaannut tamanit suliniuteqartoqartariaqarnera, matumani meeqqanik innarliisarnerit amerlasoorujussuit ilanngullugit, Naalakkersuisut taamani massakkullu isumaqatigaat, uani iliuutsiniit pinerluttuliornerusunit aamma akuerineqarsinnaanngitsunit pinerluttuliornerup pinerata kingorna iliuusereriikanut kinguneqartitsinerit ilanngullugit. Tassunga atatillugu ajortumik ingerlanerup kipitinneqarnissaanut aamma nutaamik pinerluttuliornerup pitsaaliorneqarnissaanut kingumut innuttaasutut inooqataasinnaalersitseqqinnejakuuvoq pingaaruteqartoq.

Pinerluttulerinermi inatsisip inuunitsinnut piviusumut naleqqussarneqarnissaa, innuttaasut eqqartuussiveqarnermut tatiginninnissaat pingaaruteqarpoq. Eqqartuussutip eqqartuussutigineqartup, pinerluttuliornernut suutsinut allanut attuumassuteqarnera aamma inuiaqatigiit naapertuilluarnermik isiginninnerisa akornanni ataqtigitoqassaaq. Ataatsimiitaliarsuup sivisuumik suliaqarsimanera tunngavigalugu pinerluttulerinermi inatsit ukiut massakkut atuuttoq 15-it matuma siorna pilersinneqarpoq. Eqqartuussiveqarneq pillugu ataatsimiitaliarsuup inerniliussai inatsimmi ersersinneqarput, inatsillu ingerlaavartumik nutarterneqartarpoq aaqqissuunneqartarlunilu.

Inatsisit atuutsinneqarnerannut suliassaqarfitsinnut siunissami killiliussassat pillugit oqallittoqarnissaa innuttaasut aamma Inatsisartut ilaasortaasa akornannit kissatigineqarmat ersarippoq. Sammisaq pingaaruteqartorujussuuvoq, taannalu peqqissaarnissamik aamma piviusumik pullaveqarnissamik piumasaqaateqarfiuvoq. Pillaatissiissutaasunut killiliussat equnneqarsinnaanerat pillugu aalajangiinermut tunngaviliisinnaasumik, ilisimasanik katersineq Naalakkersuisut aamma aallartereersimavaat.

Siusinnerusukkut ilisimatissutigineqareersutut, Kalaallit Nunaanni Eqqartuussutit, pineqaatissiissutit aamma isummat pillugit misissuinissaq pillugu 2023-imi Ilisimatusarfimmik ilisimatusartumik Naalakkersuisut isumaqtigisusorsimapput. Kalaallit Nunaanni pineqaatissiisarnerit maannakkorpiaq qaffasissusaat pillugit, kiisalu pinerluuteqarnernut pineqaatissiissutit pillugit innuttaasut qanoq isumaqarnerisa paasineqarnissaat, misissuinerup tutsuiginartumik takutissavaa. Innuttaasut kissaataannut pinerluttulerinermi inatsisip naleqqussarneqarnissaanut suliap ingerlaqqinnissaanut tunngaviliinissaq, misissuinerup siunertarerpiarpaa.

Kalaallit Nunaanni pinerluttulerinermi inatsimmi pillaatissiissutaasunut killiliussat equnneqarsinnaanerat pillugu naliliinissamut misissuineq tunngaviliisinnaasoq, Naalakkersuisut neriorsuutigereersimavaat. Taamaattoq pillaatissiissutaasunut killiliussat equnneqarnissaat pillugu inaarautaasumik aalajangiisoqartinnagu, misissuinerup aallartinneqartup inerniliussassaata naammassineqarnissaat, Naalakkersuisut kissaatigaat. Qallunaat oqartussaasuut saaffiginnitoqartinnagu, Kalaallit Nunaanni pillaasarnermi inatsimmi allannguutit aamma Kalaallit Nunaanni innuttaasut akornanni oqallinnerit ilisimasanik tunngaveqassasut, Naalakkersuisut isumaqarput. Qallunaat iliuusereriikanut kinguneritittagaasa equnneqarnissaat naleqquttuunavianneqilaq, taakkumi qallunaat piviusumik inuunerannit, malunnartumik suliassaqarfiit ilaanni uagut piviusutsinnit allaanerusumit, tunngaveqarput.

Pillaasarnermik inatsimmik imaluunniit Kalaallit Nunaanni pinerluttulerinermi inatsimmi pillaatissiissutaasunut killiliussanik eqqussisoqarpat, taamaaliornerit qanoq kinguneqarsinnaanerat pillugit allaaserinnittussamik suleqatigisitanik paasisimasaqarluartunik pilersitsisoqarnissaa, taamaammat Naalakkersuisut siunnersuutigaaat. Suleqatigisitat paasisimasaqarluartut suut sammissaneraat, kikkut suleqatigisitanik paasisimasaqarluartuni peqataassanersut, aamma suliap qaqugukkut naammassineqarnissa naatsorsuutigineqarnersoq, suliarisassat allattorsimaffianni erseqqinnerusumik allaaserineqassapput.

Tamanna tunngavigalugu allannguutissatut siunnersuut tulliuttoq Naalakkersuisut saqqummiuppaat:

Annertuumik inatsisitigut isumannaatsuuunissamik aamma inatsisitigut naapertuilluarnerup annertuumik peqataaneranik, inuaat inuit inatsisitigut illersugaanerannik pingaartitsisut attiinnarneqarnissaat anguniagarineqassappat, pinerluttulerinermi inatsisip eqqartuussisarnermillu inatsisip illersorneqarsinnaasumik aaqqissugaanerannik naliliisussamik suleqatigisitanik paasisimasaqarluartunik Naalakkersuisut pilersitsinissaannik peqquneqarnissaat pillugu Inatsisartut aalajangiiffigisassaatut siunnersuut. Ilaatigut iliuusereriikanut kinguneqartitsinernut killiliussat aamma innutaasut isumaat pillugit misissuineq aallartinneqareersoq tunngavigalugu, Kalaallit Nunaanni pinerluttulerinermi inatsimmi pillaatissiissutaasunut killiliussat equnneqartariaqarnersut pillugit suliarisassat allassimaffianni ingerlanissap qanoq ingerlanissaa allaaserineqassaaq. Suliarisassat allassimaffiat UPA 2025-imi saqqummiunneqassaaq.